

■ OR DA LA VITA DA LUDMILLA CAHENZLI

Handletg cun biscotgs

«Mes collega ma sto dar oz ina milkschnitte», di mes mat.

«Pertge sto tes collega ta dar ina milkschnitte?», dumond jau.

«Ier da pausa hai jau dà ad el in biscotg», declera el.

«In biscotg?», smirvegl jau. «Ma in biscotg è gea total sitg e nagut bun. Ed ina milkschnitte è segir insatge fitg bun.»

«Cler», di mes mat tut content. «Ina milkschnitte è in biscuit da tschigulatta cun si nutella e groma dultscha.»

«E pertge pomai è tes collega pront da barattar ina milkschnitte per in biscotg?»

«Jau na sai era betg», di el cun fatscha innocenta. «Ils auters vulan er adina barattar cun mai mega bunas chaussas, per exempel minipics u dultscharias e da quai.»

Jau sun surstada. Mes uffants talunan adina ch'els n'hajan mai bunas chaussas da pausa. Els hajan adina be biscotgs sitgs

e stoppian guardar co ch'ils auters traguttian uschè buna rauba. Jau hai gia empruvà bleras giadas da furnir meglras pausas a mes uffants. Jau hai cumprà farmers u tustgets. Ma en mes perchasa svaneschan talas chaussas sur notg. L'autra damaun hai be pli stgatlus ed intginas mieulas en stgaffa. Magari capita quai schizunt da bel cler di. Perquai ston mes paupers uffants adina ir a scola cun biscotgs sitgs.

Ma che mes mat vegn da barattar ses biscotg cunter insatge meglier, ma para enorm suspectus. Ins legia gea dapertut en las gasettas ch'i dettia gia sin las plazzas da scola structuradas mafiosas, nua ch'intgins scolars mettan auters sut squitsch.

Jau dumond pia il mat: «Fas ti forsa tema a tes camarats per ch'els barattian?» «Na, jau na fatsch nagut. Ma ils auters na survegnan mai biscotgs da la

mamma, ed els han mega gugent biscotgs.» El di quai a moda uschè natirala ch'jau al crai.

Jau stoss conceder ch'jau sun total loscha. Sche mes mat vegn gia en la terza classa da barattar in biscotg sitg cunter ina milkschnitte u cunter in minipic, lura n'èsi da far nagins quitads per el. Tge barats e fatschentas vegn quel pir a far en il futur? Jau ves mes mat gia sco smart manager en in grond biro d'in sgrattatschiel davant in tarment pult glischant da vaidar. El, il super um da fatschenta, cun il qual l'entir mund vul far barats. Ma in zic in curius sentiment resta tuttina. In biscotg cunter ina milkschnitte! Tge vegn quai ad esser en il futur?

Il cudesch pon ins retrair online tar Lia Rumantscha www.liarumantscha.ch (http://www.liarumantscha.ch/sites/content/online_shop.html?shop:view=details&shop:productid=2830) u tar mintga libreria

